

REGLUGERÐ

**um sérstaka úthlutun skv. 9. gr. laga nr. 38, 15. maí 1990,
til báta, sem stunda veiðar á innfjarðarækju.**

1. gr.

Vegna skerðinga, sem urðu á leyfilegum heildarafla í rækju á innfjarðasvæðum þ.m.t. Eldeyjarsvæði á fiskveiðiarinu 1998/1999, skal á fiskveiðiarinu 1999/2000 úthluta aflamarki sem nemur samtals 2.071 þorskígildum til báta, sem hafa hlutdeild í innfjarðarækju.

2. gr.

Skulu uppbætur miðast við, að skerðingin miðað við áætlaðan leyfilegan heildarafla verði ekki meiri en 30% talið frá meðalafla rækjuvertíðanna 1992/1993 - 1997/1998. Ekki skal koma til uppbóta samkvæmt reglugerð þessari hafi meðaltalsaflamark báta í innfjarðarækju á einstökum svæðum verið 52,5 lestir eða herra á fiskveiðiarinu 1998/1999.

3. gr.

Úthluta skal uppbótum til einstakra báta á grundvelli þeirrar aflahlutdeildar, sem þeir hafa í rækju á viðkomandi svæði og miðast við aflahlutdeild eins og hún var 1. júlí 1999. Uppbæturnar skuli skiptast á eftirgreindar tegundir: Þorsk, ýsu, ufsa og steinbít í hlutfalli við leyfilegt heildarmagn í þessum tegundum og verðmætastuðla.

4. gr.

Reglugerð þessi er sett samkvæmt 9. gr. laga nr. 38, 15. maí 1990, um stjórn fiskveiða, með síðari breytingum, og öðlast þegar gildi.

Sjávarútvegsráðuneytinu, 27. júlí 1999.

Árni M. Mathiesen.

Jón B. Jónasson.

REGLUGERÐ

**um greiðslu gjalds til Þróunarsjóðs sjávarútvegsins
fiskveiðiárið 1999/2000.**

1. gr.

Útgerðir íslenskra fiskiskipa sem hafa leyfi til veiða í atvinnuskyni 1. september 1999 skv. lögum um stjórn fiskveiða og útgerðir fiskiskipa sem fá úthlutað aflamark á grundvelli laga um fiskveiðar utan lögsögu Íslands, skulu greiða gjald til Þróunarsjóðs sjávarútvegsins.

Útgerðir fiskiskipa er fá úthlutað aflamarki 1. september 1999 skulu greiða gjald er nemur 1.225 krónum á hverja úthlutaða þorskígildislest miðað við þorskígildisstuðla skv. 3. gr. Gjaldið fellur í gjalddaga með þremur jöfnum greiðslum; þann 1. september 1999, 1. janúar 2000 og 1. maí 2000. Útgerð fiskiskips er fær úthlutað aflamarki á öðrum tíma innan fiskveiðiársins skal greiða jafnhátt gjald vegna þess aflamarks. Fari úthlutun fram á fyrsta ársþriðjungi fellur 1/3 hluti gjaldsins í gjalddaga við úthlutun en eftirstöðvar skulu skiptast jafnt á tvo seinni gjalddaga eins og þeir eru tilgreindir í 2. málslíð þessarar greinar.

Fari úthlutun fram á öðrum ársþriðjungi falla 2/3 hlutar gjaldsins í gjalddaga við úthlutun en eftirstöðvar skulu greiðast 1. maí 2000. Fari úthlutun fram á þriðja ársþriðjungi fellur allt gjaldið í gjalddaga við úthlutun.

Útgerðir fiskiskipa er stunda veiðar með línu og/eða handfærum með þorskaflahámarki eða dagatakmörkunum skulu greiða 1.225 kr. á hverja landaða þorskígildislest, miðað við verðmætastuðla skv. 3. gr., af þeim fisktegundum sem voru í aflamarki fiskveiðiárið 1998/1999 og viðkomandi bátur landaði á tímabilinu 1. ágúst 1998 til 31. júlí 1999 eins og aflinn er skráður í aflaupplýsingakerfi Fiskistofu. Gjaldið fellur í gjalddaga með þremur jöfnum greiðslum; 1. september 1999, 1. janúar 2000 og 1. maí 2000.

2. gr.

Hafi greiðsla fyrir gjald skv. 1. gr. ekki borist innan mánaðar frá gjalddaga á þann bankareikning sem tilgreindur er á reikningi skv. 4. gr. fellur veiðileyfi viðkomandi fiskiskips niður án frekari viðvörunar. Hæstu lögleyfðir dráttarvextir reiknast á vanskil frá gjalddaga ef ekki er greitt innan mánaðar frá gjalddaga.

3. gr.

Við útreikning þorskígilda við álagningu gjalds skv. 1. gr. skal miða við eftirfarandi þorskígildisstuðla: Þorskur 1,00, ýsa 1,15, ufsi 0,65, karfi 0,60, grálúða 1,75, skarkoli 1,10, sandkoli 0,50, steinbítur 0,70, langlúra 0,80, skrápflúra 0,50, loðna 0,05, síld 0,12, humar (slitinn) 6,80, rækja 1,05 og hörpudiskur 0,35.

4. gr.

Fiskistofa annast innheimtu gjaldsins og sendir útgerð fiskiskips reikning vegna gjalds þessa. Á reikningi skal koma fram að um sé að ræða innheimtu á gjaldi skv. lögum nr. 92/1994 um Þróunarsjóð sjávarútvegsins sem renni til Þróunarsjóðs. Ennfremur skal koma fram úthlutað aflamark eða viðmiðunarafla viðkomandi fiskiskips, gjald á þorskígildislest, heildarfjárhæð gjaldsins, gjalddagar gjaldsins og aðrir greiðsluskilmálar ásamt númeri bankareiknings sem greiða ber inn á. Gjaldið er ekki endurkræft enda þótt aflamark verði ekki nýtt. Útgerð fiskiskips er gjaldskyld vegna úthlutaðs aflamarks þótt aflamark verði framselt á annað fiskiskip.

5. gr.

Fiskistofa skal halda fjárreiðum vegna innheimtu þessarar aðgreindum frá bókhaldi sínu og skal standa Þróunarsjóði sjávarútvegsins skil á innheimtu gjaldsins eins fljótt og auðið er, þó ekki sjaldnar en einu sinni í mánuði. Þróunarsjóður sjávarútvegsins skal greiða Fiskistofu samkvæmt reikningi kostnað vegna innheimtu þeirrar sem Fiskistofa annast skv. reglugerð þessari.

6. gr.

Reglugerð þessi er sett samkvæmt ákvæðum laga nr. 92/1994 um Þróunarsjóð sjávarútvegsins með síðari breytingum og öðlast þegar gildi.

Sjávarútvegsráðuneytinu, 27. júlí 1999.

Árni M. Mathiesen.

Jón B. Jónasson.